

AUGLÝSING

um náttúruvættið Búrfell, Búrfellsgjá og eystri hluta Selgjár í Garðabæ.

1. gr.

Um friðlýsinguna.

Umhverfis- og auðlindaráðherra hefur ákveðið að tillögu Umhverfisstofnunar og Náttúrufræðistofnunar Íslands og með samþykki Garðabæjar að friðlýsa Búrfell, Búrfellsgjá og eystri hluta Selgjár sem náttúruvætti skv. 2. tl. 1. mgr. 53. gr. laga um náttúruvernd nr. 44/1999.

Búrfell er eldstöð frá nútíma með fallettri og heillegri hrauntröð, Búrfellsgjá, sem er um 3,5 km löng. Frá Búrfelli hefur runnið mikið hraun sem þekur um 18 km² lands. Innan svæðisins eru fornminjar, svo sem Gjáarétt sem er í vesturenda Búrfellsgjár, fyrirhleðslur, Réttargerði og vatnsbólið Vatnsgjá. Menningarminjar þessar eru friðlýstar samkvæmt lögum um menningarminjar nr. 80/2012.

Náttúruvættið er kjörið til útivistar, umhverfisfræðslu og rannsókna, en Búrfell og nágrenni er vinsælt útivistarsvæði.

Hið friðlýsta svæði er 323 hektarar að stærð.

2. gr.

Markmið friðlýsingarinnar.

Markmið með friðlýsingu Búrfells, Búrfellsgjár og eystri hluta Selgjár sem náttúruvættis, er að vernda eldstöð frá nútíma ásamt hrauntröð þess sem er meðal bestu dæma um hrauntraðir frá nútíma. Verndargildi svæðisins byggir fyrst og fremst á jarðmyndunum frá nútíma sem hafa hátt vísinda-, fræðslu- og útivistargildi, auk gróðurfars.

Markmið friðlýsingarinnar er jafnframt að auðvelda umgengni og kynni af náttúruminum. Vegna nálægðar við þéttbýli er svæðið kjörið til umhverfisfræðslu og útivistar. Búrfell og nágrenni er vinsælt útivistarsvæði.

3. gr.

Mörk náttúruvættisins.

Mörk svæðisins að norðaustanverðu fylgja Hlíðarvegi við innsta hluta Vífilsstaðahlíðar að beygju við enda hliðarinnar, þaðan áfram í beinni stefnu að norðvesturhorni marka Bláfjalla-fólkvangs, sveigir þaðan til suðurs og vesturs umhverfis eldstöðina Búrfell og Kringlóttugjá, og fylgja síðan mörkum Búrfellshrauns og Helgadalshrauns (sbr. berggrunnskort, Elliðavatn 1613 III SV-B) að hæsta hluta Smyrlabúðar, þaðan sjónhending í Markastein í Tjarnholtum og þaðan beina línu í punkt við Heiðmerkurgirðingu að Hlíðarvegi. Hluti náttúruvættisins er innan Reykjanes-fólkvangs. Mörk náttúruvættisins eru nánar skilgreind í hnitatöflu (ISN93) og á meðfylgjandi uppdrætti í fylgiskjali:

Nr.	X	Y
18	360324,348	397366,112
19	362212,541	385338,898
20	360845,387	394650,952
21	359592,318	396993,842

4. gr.

Vernd jarðmyndana.

Allt rask á jarðmyndunum er óheimilt í náttúruvættinu. Allar framkvæmdir sem heimilaðar verða skv. 11. gr. þessarar auglýsingar skulu miðast við að halda markmiðum friðlýsingarinnar og vernda jarðmyndanir.

5. gr.

Vernd gróðurs og dýralífs.

Vernda skal náttúrulegt gróðurfar og skapa skilyrði til náttúrulegrar endurnýjunar staðargróðurs með það að markmiði að ekki verði raskað líffræðilegri fjölbreytni svæðisins.

Óheimilt er að spilla gróðri eða trufla dýralíf af ásetningi eða gáleysi innan marka náttúruvættisins.

Óheimilt er að sleppa eða dreifa framandi lífverum á verndarsvæðinu þ.m.t. rækta framandi plöntutegundir í náttúruvættinu, sbr. reglugerð um innflutning, ræktun og dreifingu útlendra plöntutegunda nr. 583/2000. Ekki er gert ráð fyrir gróðursetningu trjáplantna eða notkun áburðar sem rýrir verndargildi svæðisins.

6. gr.

Vernd menningarminja.

Óheimilt er að hrófla við menningarminjum eða skemma á annan hátt. Gjáarétt í vesturenda Búrfellsgjár, svo og hellar og fyrirhleðslur og vatnsból eru friðlýst, sbr. þinglýsingu 6. maí 1964. Verndun annarra menningarminja í náttúruvættinu er í samræmi við lög um menningarminjar nr. 80/2012.

7. gr.

Notkun skotvopna.

Notkun skotvopna er bönnuð innan marka náttúruvættisins nema til veiða á ref, ágengum framandi tegundum, s.s. mink og vegna veiða á grundvelli 5. mgr. og 7. mgr. 7. gr. laga um vernd, friðun og veiðar á villtum fuglum og villtum spendýrum nr. 64/1994.

8. gr.

Umferð um náttúruvættið.

Almenningi er heimil för um náttúruvættið og almennt skal fylgja merktum leiðum í samræmi við fyrirmæli hverju sinni.

Umferð með hesta er heimil eftir reiðleiðum sem sýndar eru á samþykktu aðalskipulagi.

Akstur vélknúinna farartækja utan akvega er óheimill í náttúruvættinu.

Óheimilt er að hafa lausa hunda í náttúruvættinu.

9. gr.

Umsjón náttúruvættisins.

Umhverfisstofnun hefur umsjón með náttúruvættinu samkvæmt 28. gr. laga um náttúruvernd nr. 44/1999. Umhverfisstofnun skal gera samning um daglegan rekstur og umsjón svæðisins við Garðabæ sem umhverfísráðherra skal staðfesta. Í samningnum skal m.a. kveðið á um réttindi og skyldur samningsaðila, mannvirkjagerð og aðrar framkvæmdir, landvörslu og fræðslu.

10. gr.

Verndar- og stjórnunaráætlun.

Umhverfisstofnun skal sjá um gerð verndar- og stjórnunaráætlunar fyrir náttúruvættið í samráði við Garðabæ og stjórn Reykjanesfólkvangs, sbr. d-lið 2. mgr. 6. gr. laga um náttúruvernd, nr. 44/1999.

Í verndar- og stjórnunaráætlun skal fjallað um nauðsynlegar verndaraðgerðir, landvörslu og landnýtingu, s.s. aðgengi ferðamanna að svæðinu, stígagerð og uppbyggingu mannvirkja.

11. gr.

Landnotkun og mannvirkjagerð.

Mannvirkjagerð, jarðrask og aðrar breytingar á landi innan marka náttúruvættisins eru óheimilar nema með leyfi Garðabæjar og Umhverfisstofnunar, sbr. 38. gr. laga um náttúruvernd nr. 44/1999, og að teknu tilliti til ákvæða laga nr. 160/2010 um mannvirki og skipulagslaga nr. 123/2010. Framkvæmdir skulu vera í samræmi við gildandi skipulagsáætlun og verndar- og stjórnunaráætlun.

Gert er ráð fyrir að gömlum stígum og vegum verði viðhaldið sem gönguleiðum og einnig að fjölga merktum og stikuðum gönguleiðum og stígum um svæðið sem tengst geta öðrum gönguleiðum innan og utan náttúruvættisins.

Áður en ráðist verður í mannvirkjagerð innan náttúruvættisins skal deiliskipuleggja svæðið.

12. gr.

Refsiákvæði.

Brot gegn friðlýsingu þessari varðar sektum eða fangelsi allt að tveimur árum, skv. 75. og 76. gr. laga um náttúruvernd nr. 44/1999.

13. gr.

Gildistaka.


Friðlýsingin öðlast þegar gildi.

Umhverfis- og auðlindaráðuneytinu, 30. apríl 2014.

Sigurður Ingi Jóhannsson.

Guðríður Þorvarðardóttir.

Fylgiskjal.



	<p>Búrfell, Búrfellsgjá og eystri hluti Selgjár</p>	<p> Mörk friðlýsingar</p> <p> Reykjanesfólkvangur Bláfjöll</p>	<p>N</p>	<p>Flatarmál: Kortavörpun: Lambert keiluvörpun Hnitstaða: ISN93 Kortagerð: Guðni Hannesson LMf Dagur: 29.08.2012 © Landmælingar Íslands</p>
--	--	--	----------	---